

Kayëte mba Yud Wade yehëhna hnë inji kayëte

Yud aheryu Yesu, do gë Sak, herëk anji kayëte. Ñadëho kerëhnëhni vile hwëtahnëk ðuniŷa va kamënaŷehnëhni soŷe ipëh dëw hni nte mbankëni ŋa. Bare apecehnëka nësëhnëhni soŷe vëharaŋ wamër va vële rënkëf vacery sali hna. Vëharaŋ wamër va wok vëlënëndëfilahna Wënu ŋa. Yud nësëd soŷe rac gë wëdahëse wayaŷah waŷë vikerëh vicër hna. Puhnad g'inira vële hwëtahnëk va gante tëfëka kahnëndani hn'ikwëtahn do gante tëfëka ntini paŷ gë vahnë vërac.

Wëlin wanës wakwëhn nafa hn'inji kayëte: vëharaŋ wamër, dahëse, kitij, vële wok vëlënënelahna Wën.

Wëlin gante nke kayëte ka:

Simpaŷi (1-2)

Vëharaŋ wamër va (3-16)

Uhnira vële hwëtahnëk va (17-23)

Dëwara (24-25)

Simpaŷi

¹ Ami, Yud, aryokuŋëhn Yesu Këris, aheryu Sak[☆], herëhnëdëhëhni aki vële macëk Wënu ŋa Rëm ŷa. Aŋahnëku do kwëtirun soŷe Yesu Këris.

☆ **1:1** 1.1: Matiye 13.55; Marëk 6.3

² Arabi ipërëna ña, yam ña, do gë inahn ña nkwënañwu.

Vëharan wamër va rëk kitiñini

³ Vëyahnik mën, ñadëfuho ðus herëhnu soñe ipëh inte vankinëk. Bare doliñi tëkatëbu afo herëhnu inë hañary soñe hamëhnañehnu uwët soñe ikwëtahn inte njëdakëhni Wënu ña soñe kantëm fop vële hwëtahnëk va. ⁴ Kerëhnedëmu kabi ankeni vahnë vële wok vëlënënelahna Wën, vële yëbaku, hara yëtëluhna. Achëtëdëni ipërëna Wën fu ña soñe catënahñeni ndakëntal meh dëw hni. Njahëtaniha asankaf do Ahwëhn fu ryamboli, Yesu Këris. Mbiñëk ga kerik hnë Vikerëh hna gante kitiñëdëhëhni Wën ka.

⁵ Andënkwëtehnëdëmu, mama njëtahnërun wante ñadëfu hnësu ñi, Ahwëhn a pehëtëkëhni bulunda Isërayel nkal Esipët hna, bare, ge ndëcëk umë, vële wëñëk kwëtahnëni va fagant lëw hni, mbëvehnëkëhni. ✧ ⁶ Dënkwëtaryinëhni wamëleka wante nkok gena gwër ucankaf nte njëdakëhni Wën ña do ravëtak dëf dëw hni ña. ✧ Wënu ña ñabehnëkëhni gë vankëncä soñe kantëm, do kwëtëni hnë mëhwëry mbë gëd hafo fac sankaf kitiñ hna. ⁷ Antë aryënkwu fëna Sodom gë Gomor gë vankol vante hwërëkëhni va vante yëdëhñak had wamëleka watac hnë ndakëntal meh ntëw hni do yëkëlehnëko ndakëni gë vële nëmpëlëntik mbahn. Nkeni had dahëse, vile rufëdëhëfu bi hak nke horot hwëdëh vë kantëm. ✧

✧ **1:5** 1.5: Icahn 12.51 ✧ **1:6** 1.6: Wapëgwala 6.2 ✧ **1:7** 1.7: Wapëgwala 19.1-35

⁸ Vëharanɔ wamër vële ye ŷal hun vi kwëhnani vankeŷa ndampo fo gë vëhni. Hudakery hudëw hni ha liŷehnëdëhëhni vëŷin: tonkënadëni vëhni dënk vimbahn vidëw hni, nŷwëŷedëni ucankaf Ahwëhn nɔ, do nŷwëdënihëhni vële ye ambin cëmb hna. ⁹ Wëlakënde Misel, asankaf wamëleka nɔ, dina rac. Wati le conkëdëniho gë Sintani ŷa soŷe mbahn Moyis nɔ, dëkënalohna nŷeŷa kitinɔtënda. Aki fo ntehnëkaŷo: «Tavëlehnëmu gë Wënu nɔ!» ¹⁰ Bare vëŷi vahnë nŷwëdëni ile nkoni vëŷëtëna, do viŷë vile ntifëni had wulaŷ, ile nŷëtëni kobëri hnagi lëw hni, rac ye ile vëvehnëdëhëhni.

¹¹ Mekëhni! Nkaŷ Kaŷe✧ tëfëni! Nŷedëhnani hnë idënt Balam soŷe nuŷahnëni kori. Ambëvëntini kabi nŷwëŷëntini had Kore✧.

¹² Vahnë vërac wëdahëse waŷeh nkeni wante ronkëned watoka wante vankërun gë vële hwëtahnëk va. Atokëntëdëni gë usëfëhnah këm do soŷe vëhni fo nahadëni. Nkeni had vënar vahnënak, bare sël ŷa pitëndëlehnëk vënar va do tëvëna. Nkeni had vatëh vante wok dëwëdina, wëlakënde wati lëw hni ŷa tëki, ankëcikëhni: wahwënta wahi cëmëhni. ¹³ Nkeni had wavonkëlo wënka wov, wante ryehëtëd waronk walëw hni, rac ye vantiyehn vantëw hni vacëfëhnah, nkal li. Nkeni had wahol wale yasaryëd pëhwëtanëhnëk Wënu nɔ ŷëŷa mëhwëryah dus soŷe kantëm.

¹⁴ Enok, ale ye ahwëhn mbëd gë vëhi hnë warëm fu hna, pëgw Adam, pëyahneko

✧ **1:11** 1.11: Wapëgwala 4 ✧ **1:11** 1.11: Vaker 16.1-35

kobëri fo wanj soje lëw hni: «Nëparyin! Ahwëhn a njijëk gë wawuli wawuli wamëleka wafacah, ¹⁵ soje kitijahn fop nkal inji. Koroteÿehnëdëhëhni fop vahnë vële wok vëlënënëlahna soje vantiyehn vantëw hni vante wok kwëhnahna untënah vante ntini gë untënah këm. Koroteÿehnëdëhëhni vëÿi vëwën vële wok vëlënënëlahna kabi njewëniha këm fo. Vële wënëk va korotehnëdëni. Koroteÿehnëdëhëhni vëÿi vëwën kabi njewëniha.» ¹⁶ Vëÿi vahnë rëkëdëni ñakëñakëndëni; nkeÿëndëni kwëlëkwël; wabal wameh wadëw hni tëfëdëni; wanës wakuman fo nësëdëni do cëkwëdënihëhni vahnë soje nuÿahnëni ile ñadëni fo.

Uhnira vële hwëtahnëk

¹⁷ Vëÿahnik mën, ge wuhnë ye, dënkwëtaryin wante ntehnëniho kobëri ña vëfayik Ahwëhn fu Yesu Këris va. ¹⁸ Ntëhnënihu: «Hnë wafac warëkwa li, nkedëni vahnë vële ryasëd viÿë vëva Wën va, do tëfëdëni wëbal wadëw hni wante wok dënënëna Wën.» ¹⁹ Vëhni fitëndëlehnëdëhëhni vële hwëtahnëk va. Vinahan vimb nkal kwëhnani; Iyir Wënu ña gena hnë vëhni.

²⁰ Bare wuhnë, vëÿahnik mën, yëryëryin uwám hun wá hnë ikwëtahn hun pacah dús hna. Yëfaryin gë fanka Iyir Ipacah ña. ²¹ Goryin kwëlëkwël hnë injahn Wën hna, këbënyin ahnuÿahnu ipërëna Ahwëhn fu ÿa Yesu Këris le yiryeryëdëhëfu g'uwám ule wok pudina.

²² Kayëhnahnëryiÿu gë vële nkok yaÿwëna ikwëtahn va; ²³ pehëtëryinëhni vëÿëntaÿ va

gë dabët hnë hwëdëh; soje vëyëntaŵ va, kaŷëhnnanëryiŵu gë vëhni, bare diyaryin wajira gë ntakah: ha, hafo ahehawu viyi vilëŵ hni va vile tonkënek wameh wadëŵ hni ŋa.

Dëwara

²⁴⁻²⁵ Cëmbënëfuna Wën ryamboli, ale fehëtëdëhëfu gë fere Yesu Këris, Ahwëhn fu ŷa! Kod nti antë aŷoŵu, do antë ahwëhnawu ile nirahnëderun, tufahnu g'uhnatah fëbah, haryënkŵ lëŵu hnë icëmb ntëŵu hna. Icëmb ŋa, icamah ŋa, inawŵ ŋa do ucankaf ŋa, umë hwëhnëk ani gë wapëgwala, gaki do kantëm! Amina!

**Vikerëh Vikasëk Wën gë Wapëgwala
Wamey: Vikerëh Vikasëk Wën gë Wapëgwala (New
Testament+)**

copyright © 2018 Wycliffe Bible Translators, Inc.

Language: (Wamey)

Contributor: Wycliffe Bible Translators, Inc.

All rights reserved.

2020-12-01

PDF generated using Haiola and XeLaTeX on 21 Feb 2024 from source
files dated 29 Jan 2022
f961026b-f72f-5bd7-9f75-efa7f932577e